

Urteko 16. Igandea (B)

LEHENENGO IRAKURGAIA

Neuk bilduko ditut bizirik geldituriko neure ardiak eta artzainak ezarriko dizkiet.

Jeremías Profetearen liburutik. 23, 1-6.

Hau dio Jaunak: «Zoritxarrekoak nire larreko artaldea sakabanatzen eta galtzen uzten duten artzainak!» Beraz, hau diotse Jaunak, Israelgo Jainkoak, herria gidatzen duten artzainei: «Zeuek sakabanatu eta jaurti dituzue nire ardiak eta ez zarete haietaz arduratu. Bada, kontuak eskatuko dizkizuet zeuen jokaera txarrarengatik.

Hala diot nik, Jaunak. Neuk bilduko ditut bizirik geldituriko neure ardiak, sakabanatu nituen herrialde guztietatik. Beren larreetara ekarriko ditut berriro, hazi egingo dira eta erruz ugalduko. Ongi zainduko dituzten artzainak ezarriko dizkiet, inoiz ere beldur eta izu ez daitezen eta bat ere gal ez dadin. Nik, Jaunak, esana».

Jaunak dio:

«Begira, badator garaia,
Davidi legezko ondorengoa
ernearaziko diodana .

Zentzuz gobernatuko duen
erregea izango da,
eta zuzenbidea eta justizia
ezarriko ditu herrialdean.

Haren erregealdian
Juda salbatua izango da,
Israel seguru biziko.

“Jauna gure salbamena”
emango diote izen».

Jaunak esana.

SALMOA

Salmoa 22, 1-3a. 3b-4. 5. 6

R

Jauna dut artzain: ez zait ezer falta.

Jauna dut artzain: ez zait ezer falta.

Larre guritan etzanarazten nau,
ur baretara eramaten,
eta indarrak berritzen **R.**

bide egokitik narama, leiala delako.

Ibar beltz-ilunetan banabil ere,
ez dut inolako gaitzen beldurrik,
zu nirekin baitzaude:
zure artzain-makilak lasaitzen nau. **R.**

Zuk atontzen didazu mahaia
etsaien begi aurrean,
ukenduz gantzutzen didazu burua;
gainezka dut kopa. **R.**

Bai, zorionak eta leialtasunak inguratuko naute
bizitzako egun guztietan;
Jaunaren etxean biziko naiz
amaigabeko egunetan. **R.**

BIGARREN IRAKURGAIA

Kristo da gure bakea. Bat egin ditu berak bi herriak.

San Paulo Apostoluak Efesoarrei egindako gutunetik. 2, 13-18.

Senideok: Orain, berriz, Kristo Jesusenak eginik, garai batean urruti zinetenok, hurbildu egin zarete Kristoren heriotzari esker.

Izan ere, Kristo da gure bakea. Bat egin ditu berak bi herriak, bereizten zituen etsaigoaren hesia deseginez. Bere gorputzean baliogabetu egin du legea bere agindu eta arauekin, eta bi herriekin gizadi berri bakarra sortu du bere baitan, bakeak eginez.

Bi herriak Jainkoarekin adiskidetu ditu eta gurutzeko heriotzaren bidez gorputz bakar batean elkartu, beraien arteko etsaigoa suntsituz. Bere etorrerarekin bakearen berri ona hots egin zigun: bakea zuei, urruti zinetenoi, eta bakea hurbil zirenei. Zeren bai batzuk eta bai besteok hurbil baikaitezke Aitarengana Espiritu berarengan elkarturik.

Jaunak esana.

Aleluia Jn 10,27

Aleluia, aleluia.

Nire ardiek nire ahotsa entzuten dute,
- dio Jaunak -
eta nik ezagutzen ditut; haiek atzetik jarraitzen didate. Aleluia.

EBANJELIOA

Artzain gabeko ardiak bezala zebiltzan.

+ Jesu Kristoren Ebanjelioa San Markosen liburutik. 6, 30-34.

Denbora haietan, Apostoluek, berriro Jesusengana bildu zirenean, egin eta irakatsi zuten guztiaren berri eman zioten. Jesusek esan zien: «Zatozte zuek bakarrik leku gorde batera, eta hartu atseden pixka bat».

Asko baitziren joan-etorri zebiltzanak, eta ez zuten jateko astirik ere.

Orduan, bazter batera joan ziren, beraiek bakarrik, txalupaz. Baina jende askok ikusi zituen alde egiten, eta nora zihoazen igarri ere bai, eta herri guztietatik leku hartara jo zuten lasterka, haiei aurrea hartuz.

Txalupatik jaitsi zenean, jendetza handia ikusi zuen Jesusek. Errukitu egin zitzairen, artzain gabeko ardiak bezala baitzebiltzan, eta irakasten hasi zitzairen luze eta zabal.

Jaunak esana.

Blog: <https://homiliaspagola.blogspot.com/>